

**SPORTSKO RIBOLOVNI SAVEZ
BOSNE I HERCEGOVINE**
Ulica, Ive Andrića 4.
71123 ISTOČNO SARAJEVO
E-mail: srsbihk@gmail.com
Facebook: RIBOLOVNI SAVEZ BiH
WEB SITE: srsbih.com/web



**СПОРТСКО РИБОЛОВНИ САСЕЗ
БОСНЕ И ХЕРЦЕГОВИНЕ**
Улица, Иве Андрића 4.
71123 ИСТОЧНО САРАЈЕВО
E-mail: srsbihk@gmail.com
Facebook: RIBOLOVNI SAVEZ BiH
WEB SITE: www.srsbih.com/web

SPORTS FISHING ASSOCIATION OF BOSNIA AND HERZEGOVINA

Tel: 00387 61 217 870 ,Tel/ Fax: ++387 33 485-719 Ž.R. 1610000012560056 Raiffeisen bank BiH
ID=4200830340002

Broj: 155/2019

Usvojeno na sjednicu UO SRSBiH

P R A V I L N I K

O SPORTSKO RIBOLOVNIM TAKMIČENJIMA U DISCIPLINI LOV ŠARANA I AMURA

Sarajevo, 2019. godine

Na temelju člana 4.3.4 Statuta Sportsko ribolovnog saveza Bosne i Hercegovine ,Upravni odbor
SRS BiH na sjednici održanoj dana 15.03.2019. godine u Istočnom Sarajevu ,
d o n o s i :

P R A V I L N I K
O SPORTSKO- RIBOLOVNIM TAKMIČENJIMA U DISCIPLINI
« LOV ŠARANA I AMURA »

Član 1.

Ovim Pravilnikom utvrđuju se tehničko-organizacijski propisi za provođenje takmičenja u disciplini «LOV ŠARANA I AMURA» i on je osnova za izođenje takmičenja u ovoj disciplini čije se ostvarivanje provodi kroz Premijer ligu u lovu šarana i amura BiH

Član 2.

Pravilnik je usklađen sa najnovijim odredbama «CARP FISHING» asocijacije F.I.P.S. e.d., usvojenim na Kongresu u Rimu 16-17.11.2018.godine i prilagođen takmičenjima u organizaciji SRS Bosne i Hercegovine.

Član 3.

Ovim Pravilnikom utvrđuje se:

1. ORGANIZACIJA TAKMIČENJA:
 - Vrste i nivoi takmičenja
 - Registrovanje timova i takmičara
 - Oficijelna-zvanična takmičenja
 - Regionalni i lokalni kupovi
 - Uređenje takmičarske staze
 - Obrazovanje stručnog tima—službene osobe
 - Mjere u slučaju nepogoda
2. SASTANAK ORGANIZATORA, KAPITENA I VODSTVA EKIPA
 - Prijave, provjere i upoznavanje
 - Upoznavanje sa pravilima i propozicijama
 - Žrijebanje startnih pozicija
 - Upoznavanje sa zvaničnicima
 - Pribor i mamci
3. ŽIRI TAKMIČENJA
 - Dopuna izborom predstavnika takmičara
 - Nadležnosti u izricanju kaznenih mjera
4. PLASMAN
 - Obrazovanje bod listi
 - Svečano uručenje priznanja
 - Izbor reprezentacije SRS BiH
5. ZAVRŠNE ODREDBE I ORGANIZACIJA

Član 4.

Takmičenja mogu biti:

1. Međunarodna

- Svjetska prvenstva u organizaciji i po kalendaru F.I.P:S. ed. Federacije
- Regionalni i lokalni kupovi

2. Službena –oficijelna takmičenja po kalendaru i pravilima ovog pravilnika u organizaciji SRS Bosne i Hercegovine, a :

- Organizuju se kao «OTVORENA PRVENSTVA» ili
- kroz Premijer liga SRS BiH u sportskom lovu šarana i amura

Član 5.

Sticanje prava nastupa na nekom od navedenih takmičenja uređuje se odredbama ovog Pravilnika, osim na lokalnim i regionalnim domaćim i međunarodnim kupovima koji se održavaju po pravilima i propozicijama organizatora.

Član 6.

Premijer liga u lovu šarana i amura BiH je pojedinačno takmičenje parova (u daljem tekstu CT skraćeno od Carp Team) koje se održava kroz minimum 4 četiri kola, za svaku godinu ponaosob. Odluku o izmjeni broja kola donosi TK SRS BiH najkasnije 15 dana prije početka lige. Da bi se provela Premijer liga BIH u lovu šarana i amura, potrebno je minimalno 7 CT.

CT čine minimalno tri, a maksimalno 4 člana.

Neposredno prije početka svakog kola, kapiten popunjava prijavu u kojoj mora navesti, minimalno dva člana koji počinju takmičenje u tom kolu, i maksimalno jednog rezervnog.

Član 7.

Prije početka Premijer lige BiH, svaki prijavljeni takmičar se, bez obzira na starosnu dob ili pol, mora registrovati za tekuću takmičarsku godinu. Registraciju provodi kancelarija SRS BiH u koordinaciji sa komesarom lige, a sve u skladu sa odlukama UO SRS BiH, za tekuću takmičarsku godinu. Takmičari su obavezni da prilikom prijave CT za predstojeću ligu dostave i fotokopije takmičarskih (registracijskih) knjižica kao i fotokopije ribolovačkih dozvola /članskih knjižica, ovjerenih za tekuću godinu i izdatih od strane SRD (Sportsko ribolovačkih društava) koje moraju biti članice SRS BD, SRS FBiH ili SRS RS. Takmičari su obavezni, da na zahtjev Delegata, Komesara ili Vrhovnog sudije, istima pokažu originalne takmičarske i članske knjižice.

Član 8.

Službene osobe na takmičenju koje organizira SRS BiH su:

1. Delegat SRS BIH, koga imenuje Upravni odbor na prijedlog Takmičarske komisije
2. Predstavnik domaćina takmičenja,
3. Vrhovni sudija
4. Komesar lige
5. Sudije za vaganje
6. Startne sudije

Napomena :

Službene osobe na takmičenju se delegiraju iz reda najiskusnijih sudija za ovu disciplinu, a po mogućnosti iz najbliže okoline BEZ OBZIRA NA ENTITETSKU PRIPADNOST

Član 9.

U okviru svojih nadležnosti, Vrhovni sudija sa sudijama izvršiocima obvezno prije takmičenja provjerava koliko su upoznati sa Pravilima i propozicijama takmičenja na kojem sude. Naročito ih upozorava na mjere koje treba da preduzimaju prema takmičarima koji se ne pridržavaju pravila i propozicija, kao i na mjere koje njemu stoje na raspolaganju, kada su u pitanju propusti sudija u toku takmičenja.

Član 10.

Zvaničan sastanak službenih osoba, sa predstavnicima CT, održava se najmanje 4 sata prije početka takmičenja. Na tom sastanku se obvezno vrši prozivka, provjera registracija i druge formalnosti, a potom se daju osnovne naznake pravila i propozicija, dopune istih koje su u međuvremenu nastupile, te odgovara na pitanja u vezi s tim.

Član 11.

Izvlačenje startnih pozicija obavlja se nakon utvrđivanja redoslijeda izvlačenja, a koje provodi vrhovni sudija, prozivajući ekipe po abecednom redu. Svako parno takmičnje ekipe izvlače redoslijed izvlačenja startnih pozicija od Ž, a svako neparno od A. Redoslijed izvlačenja startnih pozicija se vrši u svakom kolu bez obzira na žrijeb i raspored u prethodnom kolu.

Član 12.

Kapiten ili član CT popunjava prijavu za svoj CT. Ukoliko CT kasni na izvlačenje, čuva mu se mjesto (posljednje u žrijebu) ali samo u slučaju telefonske najave kašnjenja. Vrhovnom sudiji, delegatu ili komesaru lige. Za odsutne predstavnike CT žrijebanje obavlja delegat takmičenja. Početak može biti odložen za 60 minuta ukoliko kasni najmanje jedna trećina CT.

Član 13.

Izvlačenje startnih pozicija treba biti obavljeno najmanje 150 minuta prije početka takmičenja.


Član 14.

Takmičarska staza treba da ima ujednačene pozicije, a razmak između pozicija treba da bude od minimalno 20m do maksimalno 60m, a u dogovoru sa vrhovnim sudijom i delegatom takmičenja, komesar lige, može odobriti odstupanje od ovih dimenzija ukoliko sa za tim ukaže neophodna potreba na terenu.

Minimalna širina staze mora biti 100m ukoliko se peca na rijeci i ako su takmičari poredani samo sa jedne strane obale. Na drugim vodama, jezerima, minimalna širina staze mora biti 100m ukoliko su takmičari postavljeni samo sa jedne strane obale, dok je 300m minimalna širina staze ukoliko su takmičari postavljeni sa obje strane obale, odnosno jedni nasuprot drugih. Dubina vode mora biti najmanje 1,5 metara. Na takmičarskoj stazi startna pozicija broj 1 se uvijek nalazi sa lijeve strane kada se gleda prema vodi i staza se uvijek označava sa lijeva na desno. Početak i kraj staze su udaljeni najmanje 150 metara od prostora na kome se obavljaju neke druge aktivnosti. Ukoliko se peca sektorski, onda sektori moraju biti udaljeni 200m jedan od drugoga.

Svim učesnicima Premijer lige, kao i posjetiocima, je za vrijeme takmičenja zabranjena vožnja bilo kakvim motornim vozilima po stazi.

Prevozna sredstva kojima su CT došli na takmičenje mogu ostati parkirana pored ali najmanje 5 m od startne pozicije i ne smiju se paliti ni pomijerati tokom takmičenja.



A -pristup dozvoljen samo takmičarima ali i sudijama i to samo prilikom vaganja ulova, kao i u izuzetnim slučajevima (ako sumnjaju ili su primijetili neku nedozvoljenu radnju), kao i predstavnicima akreditovanih medija, ukoliko za to ima pristanak i kapitena CT i Vrhovnog sudije

B-pristup dozvoljen samo sudijama i rezervnom takmičaru tog CT kao i predstavnicima nekog od akreditovanih medija ukoliko za to ima pristanak kapitena CT

C i D-pristup dozvoljen svim učesnicima tekuće Premijer lige, ali ne i posjetiocima/gledaocima

Startna pozicija je širine 20m(strana prema vodi) x 12m i sa tri strane je ograđena prigodnom ogradom(po mogućnosti trakom),a četvrta strana je voda.Zabacivanje mamaca,privlačenje ribe,prihranjivanje,prihvat ribe u meredov i čuvanje ribe se vrše u zoni 20m (zamišljena granica na vodi),a sve ostale radnje i kretanje,takmičari obavljaju isključivo iz startne pozicije,tj širine 20m.Takmičari u izuzetnim slučajevima mogu ribe čuvati i van zone 20m ukoliko glavni sudija procijeni da je bolje za ribu,zbog npr,hladovine,dubine vode i sl.

CT mora koristiti isključivo šatore za boravak na startnoj poziciji i to u diskretnim bojama: tamno zelena, smeđa, kamuflažna i slične boje. Kamp kućice, kamperi i ostala prevozna sredstva nisu dozvoljeni za korištenje takmičarima za vrijeme takmičenja. Kao i šatore, niti ostale pomoćne stvari (suncobrani, tende itd.) za boravak na startnoj poziciji nije dozvoljeno koristiti u svijetlim bojama kao što su: narandžasta, bijela, žuta itd..

Obavezno se u startnoj poziciji(prostoru 20 x 12m) postavljaju šatori,tende i suncobrani kao i sve ostalo potrebno za takmičenje od minimum 50h.Šatori se,eventualno mogu postaviti van zone 20 x 12m ukoliko je Glavni sudija procijenio da je to neophodno na datom terenu.

Rezervni takmičar ne smije ulaziti u startnu poziciju (pozicija A na skici) niti pružati svom CT bilo kakvu pomoć osim verbalne i može biti smješten u šator postavljen van startne pozicije.Izmjene takmičara se vrše pod strogim nadzorom Vrhovnog sudije i u toku izmjene rezervnom takmičaru je dozvoljeno da u startnu poziciju unese samo svoj lični prtljag i eventualno rezervni pribor. Startni sudija je dužan da obavezno u startnu listu , evidentira kada je izvršena zamjena takmičara, kao i tačno vrijeme kada je izvršena zamjena, te koji takmičar je završio takmičenje, a ko je umjesto njega nastavio takmičenje u tom CT

Član 15.

Organizator takmičenja je obavezan urediti stazu po ovom pravilniku kao i pružiti neophodan mir i bezbjednost svim učesnicima takmičenja. Takođe je obavezan svaku poziciju obilježiti tablom sa startnom listom i imenima takmičara. Komesar takmičenja mora napraviti kopiju ovog pravilnika i upravo radi ovog člana ga predati organizatoru takmičenja, kako bi organizator obezbijedio svu potrebnu akomodaciju za održavanje takmičenja na njegovoj stazi.

Član 16.

Ulazak na startnu poziciju preporučuje se 120 min prije početka takmičarskog dijela, a minimum 90 min što određuje Vrhovni sudija. Ulaskom na startnu poziciju takmičari mogu započeti pripremne radnje (postavljanje šatora, pribora i mamca) u toku kojih je dozvoljeno markiranje (sondiranje) ribolovne pozicije uz pomoć štapa, olova i markera (plovka). U tom slučaju udica ne smije biti na sistemu. U toku pripreme dozvoljen je ulazak rezervnog takmičara u prostor 20 x 12m radi pomoći ali mu nije dozvoljeno sondiranje, to jest markiranje

Član 17.

Početak takmičenja označava PRVI SIGNAL i tada prestaje bilo kakvo primanje pribora, mamaca i slično od bilo koga van boksa.

DRUGI signal označava kraj-istek vremena za takmičenje. Ako takmičar u tom trenutku zamara ribu ima na raspolaganju još dodatnih 15 minuta da ribu položi na prostirku pod uslovom da je prije ili u toku drugog signala obavijestio nekog od sudija o tome.

TREĆI signal je znak za istek tih dodatnih 15min i praktično znači kraj takmičenja.

Između PRVOG i TREĆEG SIGNALA je zabranjeno je naknadno unošenje mamaca i primame u startnu poziciju.

Član 18.

- a) Dopusćeni mamci su boili, sjemenke i peleti. Ovi mamci mogu biti prirodni ili vještački. Boili moraju biti kuvani i u takvom stanju da se prilikom laganog stiskanja prstima vrata u prvobitan oblik. Sjemenke moraju biti termički obrađene i ne smiju biti u fermentiranom stanju.
- b) Najstrože je zabranjena upotreba živih ili imitacija živih mamaca ili mamaca od metala.
- c) Dozvoljeno je korištenje svih vrsta praškaste primame, kao i formiranje kugli za primamu koje ne smiju biti većeg promijera od 70mm.
- d) Zabranjena je upotreba svih vrsta pasti.
- e) Zabranjeno lijepljenje mamaca ili primame na olovo.
- f) U toku jednog takmičarskog kola jedan CT ne smije upotrijebiti niti imati više od 150kg mamaca i primame ukupno, a strogo je zabranjeno naknadno unositi dodatne količine mamaca i primame unutar startne pozicije kao i njihovo korištenje.
- g) Zabranjena je bilo kakva termička obrada primame ili mamaca na stazi u toku takmičenja,
- h) Zabranjeno je bacanje ostatka primame i mamaca u vodu nakon završetka takmičenja.

Član 19.

Prvenstveno kolo traje od početka izvlačenja sektora i 120 min poslije takmičenja. U svom tom periodu svi učesnici takmičenja su obavezni da se ponašaju u skladu sa Pravilnikom o sportsko ribolovnim takmičenjima u disciplini Lov šarana i amura

Takmičenje (jedno kolo Premijer lige) traje neprekidno najmanje 50 sati.

Takmičari su dužni da se pravovremeno, a obavezno prije početka takmičenja, kod nekog od osiguravajućih društava, po slobodnom izboru, osiguraju od posledica nezgoda na takmičenjima, u protivnom nastupaju na svoju odgovornost.

Zbog velikih vremenskih ili elementarnih nepogoda, a pogotovo olujnog vjetra sa grmljavinom, takmičenje mora biti privremeno (najviše 12 sati) ili trajno prekinuto. Ukoliko je trajno prekinuto, a proteklo je min. 2/3 predviđenog vremena za takmičenje, rezultati se proglašavaju važećim i evidentiraju u dnevnik takmičenja. Ukoliko je takmičenje trajno prekinuto, a do prekida je prošlo manje od 2/3 predviđenog vremena za takmičenje, takmičenje se proglašava nevažećim i mora se ponoviti, a odluku o terminu i mjestu održavanja donosi TK SRS BIH. Odluku o privremenom ili trajnom prekidu takmičenja, donosi vrhovni sudija. U slučaju prekida takmičenja zbog vremenskih nepogoda, na zahtjev sudije, takmičari moraju prekinuti takmičenje, povaditi štapove iz vode i iste odložiti.

Član 20.

a) Lov šarana i amura je dozvoljen isključivo dubinskim sistemom , sa jednom udicom uz obavezno prezentovanje mamca na „ dlaci“ i olovom minimalne težine 50 gr.

b) Dozvoljeno je koristiti «back lead», ali ga na zahtijev sudca, zbog provjere da je sve uredu, ekipa mora izvaditi van i pokazati na uvid.

c) Dopušteni su akustični i elektronski indikatori trzaja

d) Zabranjeno je korištenje svih vrsta sistema i tehnike koja podrazumijevaju korištenje bilo kakvih hranilica ili plovaka .

e) Zabranjena je upotreba uređaja koji rade na principu radio talasa, a služe za primamljivanje ribe.

f) Sonari su također zabranjeni.

g) Zabranjen je izbačaj poput klatna, odnosno svaki izbačaj mora biti preko glave.

h) Sistem predveza treba obavezno omogućiti ribi što brže oslobađanje olova ako dođe do kidanja sistema tj zabranjeno je korištenje tzv fiksnih sistema i olova.

i) Dozvoljeno je korištenje lampi na glavi ili meredovu, te diskretna rasvjeta pod šatorom.

j) Zabranjeno je osvijetljavanje vode osim u zoni prihvata ribe u meredov.

k) Zabranjeno je korištenje sistema kod kojeg olovo otpada i ostaje u vodi tokom zamaranja ribe, dakle ulov koji se izvadi, a da u tom momentu na sistemu nema olova, kao takav on se ne boduje niti vaga i kažnjivo je crvenim kartonom,

l) Kod upotrebe zig rig sistema, zabranjeno je korištenje bilo kakve vrste plovka ili vještačkih pomagala za podizanje predveza u srednji sloj vode. Dozvoljen je isključivo samo predvez bez ikakvih pomagala za njegovo podizanje.

Član 21.

Ulazak u vodu do koljena je dozvoljen obojici članova CT i to samo pod uslovom da svaki od njih ponaosob zamara ili prihvata ribu u meredov, kao i u slučaju odlaganja ribe u vodu do vaganja.

Ni u jednom slučaju nije dozvoljen izlazak iz startne pozicije odnosno zamišljene zone 20m.

Član 22.

Za prihvata ulovljene ribe koristi se meredov minimalnih dimenzija otvora 70cm. Njime se koriste isključivo takmičari. Ulovljena riba se polaže na ovlaženu mekanu prostirku, zatim riba se odlaže u mrežu čuvaricu (carp sack), koja se odlaže na sigurnu dubinu do momenta vaganja.

Svaki CT je dužan da ima minimum 10 mreža čuvarica (carp sack-ova) i takodje je dužan iste pokazati na upit sudije. Mreže moraju biti izrađene od finih niti (bez čvorova i grubih vlakana i ne smiju imati na sebi rupe većeg promjera od 2mm) kako bi se izbjegla povreda ribe. Mreže čuvarice moraju biti minimalnih dimenzija 100cm x 80cm. Tokom takmičenja čuvarice za čuvanje ribe, ukoliko je riba u njoj, moraju biti potopljene cijele u vodu i ne smiju imati nikakve plovke na sebi, nikakva unutrašnja otežanja, olova i slično. Tokom takmičenja drugi sistemi za čuvanje ulova nisu dozvoljeni. Nakon vaganja riba se pažljivo vraća u vodu, od strane sudije za vaganje.

Nakon takmičenja svaki CT mora ostaviti startnu poziciju u čistom stanju, što konstatuje sektorski sudija.

Član 23.

a) Svaki CT može koristiti neograničen broj ribolovnih štapova, ali istovremeno može loviti sa 4 štapa i koristiti 2 marker i 2 spod (za raketu) stapa.

b) Ostali (rezervni) štapovi trebaju obavezno biti odloženi tako da su im vrhovi okrenuti nasuprot vodi.

c) Dužina štapova iznosi maksimalno 400 cm.

d) Korištenje multiplikatora nije dozvoljeno.

Član 24.

U periodu od 08-18:30h dozvoljeno je prihranjivanje mekom praćkom, lopaticom, katapultom bez opruge i pneumatike, raketom (otvorenog i zatvorenog tipa) promjera ne većeg od 70mm i max dužine 200mm, cjevčicom za boili (kobra) i pva materijalima.

U periodu od 18:30-08h dozvoljeno je samo prihranjivanje cjevčicom za boili (kobra) i pva materijalima.

Član 25.

VAGANJE se obavlja u najpovoljnijim vremenskim razmacima tokom dana i noći s tim da ulovljena riba ne smije provesti u čuvarici više od 6 sati. Riba se mora držati živa i zdrava u čuvarici i to 1 riba 1 čuvarica. Dakle, više od jedne ribe u čuvarici nije dozvoljeno.

Bilo koja riba koju sudijski tim zatekne u čuvaricama za čuvanje, manju od veličine koja je validna za vaganje, oduzima se od strane sudijskog tima i pušta se u vodu, a timu kod kojeg je takva riba nađena dodjeljuje se kazna.

U slučaju da tim ostane bez slobodnih čuvarica za čuvanje ribe, takmičari mogu zamoliti sudijski tim da izvrši vanredno vaganje kako bi im oslobodili prostor i čuvarice za sledeće ulove.

Vaganje ulova se obavlja na spoljašnoj ivici startne pozicije 20 x 12m, po mogućnosti sto dalje od vode. Vaganje obavlja sudija za vaganje uz prisustvo startnog sudije i po mogućnosti nekog od takmičara iz susjednih boksova. Ukoliko je na vaganju prisutan i takmičar iz susjednog boksa, nije mu dozvoljen ulazak u boks tima kod kojeg se vrši vaganje. Vaganje može posmatrati samo u prostoru B (vidjeti član 14.) gdje se nalazi zamjena od tog tima kojem se vaga. Sudija za vaganje je odgovoran za upis težine i vrste ribe u startnu listu, što se također upisuje u tabeli startnog mjesta. Vaga se samo šaran i amur, a boduju se samo primjerci čija težina nije ispod 1500g (hiljadu i petsto grama).

Validan ulov je i ako riba ode van zamišljenog sektora od ekipe koja je zamara, a takođe i zamaranje iste van svog sektora je dozvoljeno. Validnim ulovom se smatra i ona riba koja slučajno pokupi najlone od susjedne ekipe.

Nakon vaganja takmičar potpisuje startnu listu, a obavezno sudija lagano vraća ribu u vodu. Listu također potpisuju sudije prisutni vaganju. Naknadne primjedbe od bilo koga se ne uvažavaju.

Član 26.

Vaganje na stazi se po pravilu obavlja jednom vagom.

Vagu i mrežicu za vaganje sa tronošcem je dužan da obezbijedi komesar lige i on odgovara za njihovu ispravnost. Mrežica u koju se stavlja riba za vaganje ide uz vagu cijelom takmičarskom stazom i prije stavljanja ribe mora se navlažiti i vaga podesiti prema težini mrežice (tarirati).

Član 27.

Suđenje na takmičenjima organizuje Takmičarska/Sudijska komisija SRS BiH koja određuje Vrhovnog sudiju i Delegata koji su odgovorni za punu primjenu pravila takmičenja i zakonskih odredaba.

VRHOVNI SUDIJA može biti samo sudija najvišeg ranga sa dovoljno iskustva u ovoj disciplini, da može kvalitetno rukovoditi takmičenjem, provjeriti sposobnosti ostalih sudija, dati im upute za rad na uređenju staze za vrijeme trajanja takmičenja. Mora imati rješenja za sve situacije koje nastanu na stazi, a tiču se pravila takmičenja.

KOMESAR LIGE je također sudija, sa iskustvom u ovoj disciplini i obavlja adiministrativno tehničke poslove prije, za vrijeme i nakon obavljenog takmičenja. Zamjenjuje vrhovnog sudiju za vrijeme njegove pauze u vrijeme trajanja takmičenja. Prije objave rezultata takmičenja daje delegatu i vrhovnom sudiji Dnevnik takmičenja na ovjeru čime je izvršena verifikacija takmičenja.

SUDIJE NA VAGI su također sudije sa iskustvom, potpuno odgovorni za blagovremeno, ispravno i tačno vaganje, kao i popunjavanje podataka u startnu listu. Brinu se o ispravnosti vage i pribora za vaganje. U obilasku staze pomažu savjetima startnim sudijama.

STARTNE SUDIJE su također sudije sa iskustvom, ali nešto mlađi tako da mogu pratiti rad i ponašanje takmičara na više startnih pozicija. Ne ulaze u takmičarski boks osim u slučaju vaganja ili utvrđivanja krivice takmičara.

Član 28.

Vrhovni sudija na pripremnom sastanku sa sudijama pravi raspored sudija, a pri čemu vodi računa da niti jedan sudija ne provede više od 12 sati neprekidno na zadatku. Nakon provedenih 12 sati rada, obavezan je odmor od 8 sati. Ovo znači da može 12 sati raditi-suditi pa 8 sati odmarati, potom opet 12 sati raditi pa 8 odmarati i na kraju odraditi posljednju smjenu od 12 sati.

Član 29.

Za jedno službeno takmičenje uz učešće do 12 ekipa potrebno je pored Vrhovnog sudije i Komesara, dvojica sudija za vaganje i minimum dvojica startnih sudija na svake 4 ekipe

KAZNENE ODREDBE

Član 30.

Ovisno o težini pričinjenog djela učesnik takmičenja može biti kažnjen žutim ili crvenim kartonom i to za:

- nesportsko ponašanje
- fizički napad
- druge povrede i ometanje natjecanja

ŽUTI KARTON dobija takmičar i CT ako prekrši pravila iz člana:

14,16,17,18a,18c,18e,20a,20g,20h,20j,21,22,23b,23c,24, 25

Pored prekršaja pravila iz navedenih članova, žuti karton se dodjeljuje i za:

- verbalno ometanje sudija u obavljanju njihovih zadataka
- ako namjerno ozlijedi ili usmrti ribu
- ako naglo poteže udicu iz vode (haklanje, ramb, grabuljanje)
- ako nastavi loviti i poslije prekida nastalog uslijed vremenskih nepogoda
- ako neovlašteno ulazi u tuđu startnu poziciju

CRVENI KARTON dobija takmičar i CT ako prekrši pravilo iz članova:

7,18b,18d,18f,18g, 18h,20d,20e,20f, 20k, 20l, 23a,23d

Pored prekršaja pravila iz navedenih članova, crveni karton se dodjeljuje i za:

- unošenje ili pokušaj unošenja šarana ili amura na takmičarsku stazu ili unošenje ili pokušaj unošenja šarana ili amura u startnu poziciju koji nisu ulovljenu toj startnoj poziciji, te ako:

1. Takmičar koji u toku jednog kola dobije 2 žuta kartona automatski dobija crveni karton i diskvalifikaciju do kraja prvenstva. U ovom slučaju se i CT izriče crveni karton.
2. Takmičar koji u toku dva kola dobije po jedan žuti karton dobija automatski crveni karton i diskvalifikaciju do kraja prvenstva. U ovom slučaju se CT ne izriče disciplinska mjera crveni karton
3. CT koji u toku jednog prvenstvenog kola dobije dva žuta kartona (npr. zbog nepropisnog meredova i neotklanjanja greške) automatski dobija crveni karton
4. Takmičar koji dobije crveni karton automatski se diskvalifikuje do kraja prvenstva. U ovom slučaju se i CT izriče crveni karton i trenutna diskvalifikacija.
5. CT koja se neopravdano ne pojavi na jednom od kola lige, a uredno je prijavljena za takmičenje kažnjava se crvenim kartonom

Disciplinska mjera žuti karton nosi sa sobom plus 50% od mogućih maksimalnih negativnih bodova. Primjer:

12 učesnika takmičenja. Ako je neki CT osvojio četvrto mjesto odnosno ako je ostvario plasman na četvrto mjesto, što znači da ima četiri negativna boda, a u tom kolu je dobio žuti karton, tada se tom CT na ime kazne zbog žutog kartona dodaje još 6 negativnih bodova, tako da će taj CT u tom kolu imati 10 (deset) negativnih bodova

Disciplinska mjera crveni karton nosi sa sobom trenutnu diskvalifikaciju CT (ostaju bez plasmana u tekućem kolu) sa mogućnosti i duže diskvalifikacije u zavisnosti od mjera koju izrekne TK SRS BiH i plus 100% mogućih maksimalnih negativnih bodova.

U slučaju da diskvalifikacija CT uslijedi nakon obračuna rezultata, slijedeće plasirani CT zadržavaju svoj plasman.

- U slučaju iz člana 31-2(kažnjavanja takmičara crvenim tzv. parnim žutim kartonom) CT ne može popuniti rezervni takmičar u tom kolu.

Takmičarima koji na bilo koji način ometaju tok takmičenja za nesportsko ponašanje, verbalno ometanje sudija u obavljanju njihovih aktivnosti, fizički napad ili druge grube povrede pravila može se dati žuti ili crveni karton.

Disciplinske mjere crveni ili žuti karton izriče isključivo Vrhovni sudija.

Član 31.

Za takmičare kojima je izrečena mjera (žuti ili crveni karton) podnosi se i disciplinska prijava TK SRS BiH. Prijavu mora da podnese Vrhovni sudija, samostalno ili na prijedlog organizatora takmičenja ili nekog od sudija na stazi ili vaganju. Delegat takmičenja također izrečenu mjeru mora da evidentira u svom Izvještaju i o tome upoznati TK SRS BiH..

Član 32.

Dužnost je svakog učesnika na takmičenju da poznaje kompletna pravila takmičenja i predviđene sankcije tako da nepoznavanje pravila ne opravdava nikoga za učinjenu povredu pravila i izrečenu kaznu. Sudije na stazi uz sebe moraju imati ovaj Pravilnik radi razrješavanja nastalih sporova.

Član 33

Za izrečene mjere moguća je žalba:

- Žiriju takmičenja

- Takmičarskoj komisiji za mjere koje je izrekao Vrhovni sudija i potvrdio Žiri takmičenja u prvostepenom postupku

- Upravnom odboru SRS BiH za mjere koje je izrekla Takmičarska komisija u drugostepenom postupku.

- Odluke drugostepenog organa su konačne

Član 34.

ŽIRI TAKMIČENJA u sastavu 5 članova čine:

- Vrhovni sudija(predsjednik žirija)
- Komesar lige(zamjenik predsjednika žirija)
- Jedan sudija za vaganje
- Startni sudija takmičara koji ulaže prigovor. Ukoliko je prigovor vezan za postupak startnog sudije,na njegovo mjesto dolazi najstariji takmičar na stazi pod uslovom da postupak nema veze sa njegovim CT.
- Delegat takmičenja

Član 35.

Žiri takmičenja rješava i primjenjuje sankcije predviđene ovim Pravilnikom

Prigovori se podnose usmeno Žiriju(predsjedniku ili podpredsjedniku) 15 minuta nakon izricanja kazne usmeno (najava) odnosno u narednih 15min najavljeni prigovor treba obavezno i pismeno potvrditi. Žiri je dužan riješiti prigovor najkasnije 2 sata poslije podnošenja istog.

Uz prigovor se polaže kaucija od 50 KM, koja se vraća takmičaru ako se utvrdi opravdanost prigovora u protivnom novac se polaže u blagajnu SRS BiH,

Član 36.

1. Bodovanje se vrši tako što svaki gram težine nosi jedan poen
2. Kod takmičenja koja se organizuju u jednom kolu, više osvojenih poena osigurava bolji plasman.
3. Kod takmičenja organizovanih u više kola obračun plasmana se vrši za svako kolo zasebno. Pobjednik je onaj CT, koji ima najmanji zbir plasmana (negativnih bodova) svih kola
4. U slučaju jednakog broja negativnih bodova, pobjednik je CT koji ima više osvojenih prvih, drugih mjesta(plasmana)
5. Ukoliko dva ili više CT imaju isti broj osvojenih prvih, drugih ... mjesta(plasmana), veća težina ukupno ostvarenog ulova, osigurava međusobno bolji plasman.
6. Ukoliko su i te težine identične, prednost se daje CT sa težim ulovom u zadnjem kolu
7. Ukoliko su i te težine identične, prednost ima CT, koji ima teži ulovljeni primjerak, tokom čitave lige

Primjer 1. :

Dva CT dijele peto i šesto mjesto

Njihov plasman je slijedeći : $5 + 6 = 11$; $11 : 2 = 5,5$

Oba CT su u ovom primjeru ostvarila plasman 5,5 (imaju po 5,5 negativnih bodova)

Primjer 2. :

Tri CT dijele 9. ; 10. i 11 mjesto

Njihov plasman je slijedeći : $9 + 10 + 11 = 30$; $30 : 3 = 10$, Sva tri CT su u ovom primjeru ostvarila plasman 10 (imaju po 10 negativnih bodova)

Do istog se rezultata matematički dođe, ako saberemo plasman prvog i posljednjeg dijeljenog mjesta, pa dobijeni iznos dijelimo sa dva, pa bi to u ovom primjeru izgledalo

ovako : $9 + 11 = 20$; $20 : 2 = 10$

1. CT koji nema ulovljene ribe, dobija posljednje mjesto u plasmanu
2. Ako više takmičarskih parova nema ulovljene ribe, njihov plasman se dobija prosjekom svih neraspoređenih plasmana.

Primjer 1. : 15 CT

- 9 CT ima ulovljenu ribu, a 6 CT je bez ribe

Prvih devet CT, ostvaruju plasman prema broju osvojenih poena, a preostalih šest ostvaruju slijedeći plasman : $10 + 11 + 12 + 13 + 14 + 15 = 75$; $75 : 6 = 12,5$,

Jednostavnije je računati ovako : $10 + 15 = 25$; $25 : 2 = 12,5$

Svi CT u ovom primjeru, koji nisu ulovili ribu, ostvarili su plasman 12,5 u svom tj imaju po 12,5 negativnih bodova

Član 37

Nakon održanog posljednjeg kola lige, proglašava se Šaranska reprezentacija SRS BiH, koju čine 3 prvoplasirana CT i njihove dvije rezerve. Da bi rezervni takmicar prvoplasiranih CT bio izabran u reprezentaciju kao rezervni takmicar, mora kroz ligu odloviti najmanje 50 sati, a prednost se daje takmičaru koji je tu sezonu lovio duži vremenski period kroz sva kola lige. Ukoliko takmičari imaju istu "minutažu", prednost se daje takmičaru čiji CT ima bolji plasman u ligi. Ukoliko rezervni takmičari, CT koje su se plasirali u reprezentaciju, ne ispunjavaju navedene kriterije, rezervni par se bira od takmičara slijedećih ekipa po plasmanu u ligi (četvrtoplasirane, petoplasirane itd)

Član 38

Selektor reprezentacije kojeg bira UO SRS BiH je dužan da prisustvuje na svakom od četiri kola lige, kako bih se na licu mjesta mogao uvjeriti u kvalitet svake ekipe ponaosob. Takođe, mora prisustvovati i u koliko je moguće organizovati, namanje dva treninga prije odlaska reprezentacije na SP.

Član 39

Prije proglašavanja reprezentacije obavljaju se razgovori sa CT koji su izborili pravo nastupa u reprezentaciji o realnoj mogućnosti odlaska na svjetsko prvenstvo. Ukoliko se desi da neki CT odustane, razgovara se sa narednim CT po ostvarenom plasmanu.

Odustajanje od nastupa u reprezentaciji se mora pismeno obrazložiti selektoru reprezentacije.

Član 40.

Pravilnikom o reprezentativnim selekcijama utvrđen je sistem rada, treninga i opremanja, te nastupa na međunarodnim takmičenjima

Član 41

Ovaj Pravilnik je sačinjen na temelju izmijenjenog Pravilnika o lovu šarana F.I.P.S e.d. usvojenog 16-17.11.2018.godine na Kongresu u Rimu.

Uz kalendar i propozicije za svako kolo čine cjelinu sistema takmičenja u lovu na šarana.

Član 42.

Sastavni dio Pravilnika su obrasci koji čine potrebnu dokumentaciju za prijavu praćenje i evidentiranje i proglašavanje rezultata a to su:

Š1- Prijavni list za takmičenje,

Š2- Startni lista

Š3- Dnevnik takmičenja za 1 kolo

Š4 Dnevnik takmičenja za 4 kola

Š-5 Izvještaj o trenutnom poretku na takmičenju

Š-6 Obrazac Izvještaja delegata sa šaranskog takmičenja

Š-7 Obrazac Izvještaja Glavnog sudije sa šaranska takmičenja

Podaci navedeni u ovim dokumentima su obavezni za utvrđivanje plasmana i proglašavanje rezultata takmičenja. Dnevnik takmičenja sa izvještajem o provedenom takmičenju Delegat takmičenja dužan je u roku od 7 dana dostaviti u SRS BiH radi arhiviranja, a Komesar lige Izvještaj o održanom takmičenju elektronskim putem sa fotografijama uredniku WEB portala SRS BiH, radi objave rezultata i promocije šaranskog ribolova..

Član 43

Ovaj Pravilnik usvojio je Upravni odbor SRS BiH na sjednici održanoj dana 15.03 .2019.god., a primjenjuje se odmah.Njegovo tumačenje daje Takmičarska komisija SRS BiH.